

XENPELAR BERTSO ESKOLA

Gaur egun lau talde ari dira, era batera edo bestera, bertsolaritza lantzen. Hamabosgarren ikastaroa dugu oraingoa Xenpelar Bertso Eskolaren ibilbidean. Modu apal batean hasitako esperientzia, indartzen eta sendotzen ari da.

EGITURAKETA

– BAT-BATEKO HELDUEN TALDEA

Gaur egun bat-batean bertsotan ari diren bertsolariek osaturikoa da. Urtean zehar, batez ere herri mailako zenbait ekitalditan parte hartzen dutenak, beste atal batean ikusi ahal izango duzuen bezala.

– BAT-BATEKO GAZTEEN TALDEA

Oraindik bat-batean trebatzen ari direnen taldea dugu hau. Eskolarteko Txapelketan aurten ere parte hartu dute. Lehenengo fasean, oro har, saioak txukun joan dira eta finalean ordezkari bat izango dugun itzaropenarekin gaude. Lan hau argitaratzen denerako, emaitzak ezagutuko dira.

Herri mailako beste zenbait ekintzatan ere kantatu dute.

– GAZTETXOEN TALDEA

11-12 urte dituzten gaztettoek osaturiko taldea dugu hau. Bihurri samarrak badira ere, zale-tasuna azaltzen dute eta ez da gutxi hasteko. Bertsolaritzaren oinarriak ikasten hasiak dira.

– BERTSO JARRIEN TALDEA

Ikastaro honetan jarri da abian, berandu samar izan bada ere, eta talde bat osatu da. Partaideen zaletasuna eta interes handia azpimarragarriak dira. Bertso jarrien teknika lantzen eta trebatzen ari dira. Partaide bat hasia da bertsopaper lehiaketetan parte hartzen eta beste batzuk ere laster hasiko direla dirudi.



Xenpelar Bertso Eskolako kideak

ANTOLATUTAKO EKITALDIAK

– TXANTXANGORRI SARIA

Herri mailako Bertsolari Txapelketa da, aurtengo uztailean, 4. aldiz, jokatu dena. Kanpoko bertsolariren bat ere izaten da taldea osatzeko. Egungo txapelduna Ion Ansa da, berak irabazi baitzuen Galtzarabordako GURE-LEKU Auzo Elkartearen (2001-07-14) buruturiko saioa. Lan hau argitaratzen den garai beretsuan jokatu da aurtengoa, hau da, IV. Saria.

– XIII. BERTSOPAPER LEHIAKETA. “ZAPIRAIN ANAIK” SARIA

Urtero bezala, Bertsopaper Lehiaketa hau 17 urtetik gorakoentzat antolatzen da. Iazko Santo Tomas egunean banatu ziren sariak, emaitza hauekin:

- Lehen Saria: *GERRA HOTSAK ISILDU*. Mikel Arrillaga. Eibar.
- Bigarren Saria: *BI MALKO BIHOTZ BEREKO*. Ekaitz Goikoetxea. Beasain.
- Lehen Akzesita: *JOANAK JOAN*. Mikel Ugalde. Errenteria.
- Bigarren Akzesita: *URAK IRENTSI DUENA*. Jose Luis Urdangarin. Hernani.

– III. BERTSOPAPER LEHIAKETA. “IBON ZABALA” SARIA

Aurreko urteetan bezala, Bertsopaper Lehiaketa hau 16 urte arteko gazteentzat antolatzen da, *Oarsoalde* mailan (Errenteria, Lezo, Oiartzun eta Pasaia). Emaitzak, hauek izan ziren:

- Lehen Saria: *OI ENE LUR*. Gorka Etxeberria. Errenteria.
- Bigarren Saria: *PRESOAK S. O. S.* Arkaitz Oiartzabal. Errenteria.

Bi gazte hauek Xenpelar Bertso Eskolako kideak ditugu. Bat-bateko gazteen taldean dihardute, baina, bertso jarrietan ere abilak direla erakutsi dute.

Bestalde, Eskolarteko Txapelketan, aipatu dugun bezala, maila erakutsi dute.



Arkaitz Oiartzabal eta Gorka Etxeberria

– SANTO TOMAS EGUNEKO BERTSO SAIOA

Azkeneko ekitaldia ezohikoa izan zen. Xabier Amuriza eta Jon Maiak, *MENDE BATEN ALDARRIAK HOGEIGARRENEAN JARRIAK*, saio atsegin batean, historiari errepassoa emanez, bertsolari mitiko askoren bertsoak kantatu zizkiguten Niessen Aretoan.

– BERTSO KRITIKA IKASTAROA

Bi egunetan (apirilak 19 eta maiatzak 3) Xenpelar Etxean *Bertso Kritika* deituriko ikastaroa antolatu genuen,

Antton Kazabon oiartzuar ezagunaren eskutik. Bertsoa, bere osotasunean baloratzeko oinarriak eskaini zizkigun, bere ohiko modu egokian. Zaletuen aldetik erantzun ona izan zuela esan genezake. Hurrengo urteetan jarraipena izango du. Ekintza hauen arrazoia eta helburua bertsozaleen artean jende formatua lortzea da. Bertsoak tajuz puntuatzeko gai izango dena. Bertsolaritzaren mundua ez dute bertsolariek bakarrik osatzen; beharrezkoak dira gai-jartzaileak, epai-mahaikideak eta abar.

Antton Kazabon bertsozaleak trebatzen *Bertso Kritika* ikastaroan



Antton Kazabon bertsozaleak trebatzen Bertso Kritika ikastaroan

EGITASMOAK

Hurrengo urteari begira, Oiartzungo Bertso Eskolakoekin harremanak izan ditugu. Eskualde mailako Txapelketa bat antolatu nahi dugu elkarrekin 2003. urtean. laz egin genuen antzeko zerbait.

Datorren urtean, baita ere, Gipuzkoako Txapelketa jokatu da eta espero dugu Bertso Eskolako kideak lehian izatea. Modu apal batean bada ere, euren ibilbidea egiten ari dira. Gero ikusiko da nora iristen diren.

BERTSO ESKOLAKO PARTAIDEEN BERTSO SAIOAK

...JAIO DIRA BERRIAK

Aipagarrienak, hauek izan dira:

- Landarek antolatuta Niessen Aretoan 2002-04-13an egindako saioan, A. Egaña, M. Lujanbio J. Maia, X. Lizaso eta A. Arzallus, bertsolari ospetsuekin batera, Xenpelar Bertso Eskolako kide dugun Aitor Albisturrek ere kantatu zuen. Aretoa bete eta jende mordoa kanpoan gelditu zen sartu ezinik. ETBko *Hitzetik hortzera* programan saio honen laburpena eskaini zuten.
- Arkaitza Tabernak antolatutako saioa (2002-04-19). Hemen, normalean, beste bertsolari gazte batzuek ere parte hartzen dute talde egozia osatzeko. Ez du lehia kutsurik. ETBko *Hitzetik hortzera* programan honen laburpena ere eskaini zuten.



Arkaitza Tabernako bertso saioa

Arkaitza Tabernako bertso saioa

- Bertso-afariak. Niessen Lantegiko Euskara Taldeak eta Lau Haizetara Euskaldunon Elkarteak antolaturiko saioan (2002-05-10), Maialen Lujanbio eta Anjel Mari Peñagarikano bertso-lari ezagunekin batera, Ion Ansa eta Aitor Albistur ere bertotan aritu ziren.

Herrian beste saio batzuk izan dituzte eta inguruan ere bai: Donostian, Lezon eta San Pedron, besteak beste.

- Urte zahar eta Santa Agedako koplak kantatzen ere jardunak dira Ereintzarekin, ohikoa den bezala.

III. BERTSOPAPER LEHIAKETA. "IBON ZABALA" SARIA

OI ENE LUR

Lehen Saria: Gorka Etxeberria
Doinua: Habanera

1

Hebronen jaio nintzen ni
duela hamabi urte
eta nere etsipena
orain azaldu nahi nuke
nik ezer ez dakitela
zuek etzazute uste
zeren nere bihotzean
ditut hamaika apunte.
Borrokan ibiltzen gara
egunero jo eta ke
garra guztia jarriaz
guk garaipenaren truke
eta Israelek dauka
gerran hamaika bertute
baina azkenean gerra
beraiek galduko dute.

2

Nere aitatzok bete du
Israeldarren kondena
tiro batekin hil zuten
bihotzean daukat pena
aitaxoren bizitzari
egin zioten etena
famili dana hil zuten
hori gauza nabarmena,
nahiz atzoko heriotza
den biharko garaipena
nere aitaren hilketa
ea daukagun azkena
senide bat erahiltzea
ez da gauza ederrena,
nik daukat bihotz barnean
nere zauri haundienaz

3

Ala da gure jainkoa
Ala da gure bihotza
eskeini diezaiozun
gure garaipen mingotsa
baina gerrako epea
zoritarrez ez da motza
oraindik pasa behar dugu
guk gosea eta hotza.
Zera esan nahi dizut nik
lehendakari arrotza
egiten duzunarekin
eduki beharra lotsa
herria defenditzeko
zu izan zaitez zorrotza
ea noizbait bukatzen den
hemengo metraila hotza.

4

Dugun egoera orain
ez diot inori opa
egoera zail honekin
gaude etsipenez jota
baina herriarengatik
egin behar da borroka
nahiz kolokan jartzen dugun
gure bizitzaren soka,
daude milaka soldadu
edo ehundaka tropa
etsaia ikusterako
guk azkar tiroa bota
nahiz ez dugun ezagutzen
bihotzez zaigu inporta
inorren garaipena da,
beste guztion porrota.

5

Gerra hontan ez da inor
ziurrenik txapelduna
zeren bihotzean dugu
gehienok kriston hutsuna
bilakatu behar dugu
Israel gure laguna
lehendabizi itzultzea
lapurtutako fortuna
eman behar digutela
guri merezi duguna
justizia beteko da,
iritsiko da eguna
zera edukiko duzu
oi Palestina kuttuna
merezi duzun bakea
lurra ta askatasuna.